

KA'N HAWI KIRA

H. Thangmawia

Tun huna pensioner, Tar awm mai mai ka nih hnuah hian ka hun kal tawh thlirin ka'n hawi kir a, sorkar hnathawk nih chak em em a, ka \awngtaina apianga ka dil \hin chu chhana awmin AH & Vety hnuaiiah Tracer/S.A hna thawk turin Selesih Cattle Breeding Farm; Labour Barak (1) Bawng in (1) Mihring chenna tur (1) chauh la awmnaah chuan puanthuah telin a lo awm sa Asst. Farm Manager 1, Chowkidar 1 leh Labour (Santal) 10 te chu ka han zawm ve a. Ka hlim leh lawm zia chu sawi thiam phak pawh a ni lo

Bawng in chhunga bawng sira riak Gorkhali te nupa leh an fa te tak te te chuan Mizorama chhuak hmasa Shillong bawng lian an tih hnute chu an han sawr a, ni khatah vawi thum sawrin ni khatah litre10 lai an han sawr mai \hin chu tam kan ti thei khawp mai. Aizawl a\angin motorin an rawn la \hin a.

Aizawl khawpui lunlai vety District Office, Zarkawt a\angin an zuar chung pawhin an hralh zo thei meuh lo. A chhan ni a lang chu, khatih hunlai khan mi tam berin Dut a \in a awm kha an hmang a. Bawngpui hnute hlutna pawh an hre pha lo va. Duh em em na pawh an nei chuang lo niin a lang. Tunah erawh chuan buhfai thlak no tur pawh dut \in ruak kan hmu pha ta meuh lo. Dut no khat tih pawh \awng upa a ni lek lek tawh a nih hi.

Ka hlawh lak hmasakin pheikhawk pum (Mangai pheikhawk) ka lei ve a. Slipper a\anga mangai pheikhawka han kai chu ke a no duh chak chak khawp mai.

Hun a lo kal zel a, Department-in hma ala zel a, motor-a sem a ni ta a. Buaina tam tak awmte zingah IGP kah tuk, Curfew hnuaiia bawnghnute sem chu sawi lo mai ila. Bawnghnute duhtu an pung chak hle a ni. Hma zauh zelin Dr. H. Chalruala'n Ganavaram, Tamil Nadu a\angin Department Truck hmangin vawk chi \ha, a note 100 lai niin ka hre ta, a zuk tawlh chhuak a. Kawngah thlakhat dawn lai thang mahse thi loin a rawn thlen a. A pa pathum chu chithlah atan an rawn hawn tel a. Vawk chi \ha (var) pawh semchhuah a ni ta a. Ar te pawh la leh zelin Ar awp keuna khawl te lak zel a ni a. He khawlin a mamawh generator lian bun a nih takah khan a thawm a ring deuh bawka. A khat tawka Selesih kawm rawn tlawh \hin sakei pawh a reh hlen ta a niang, a hnuhma hmuh a awm zui ta lo. Sapui (sakei) chauh hi a bo a ni lova. Dut \in kan hmu pha ta lo va, zo vawk a bo lek lek a. Nau rual deuh chawlhni tuka Ar pahnih talh \hinten Ar pakhat an kham thei ta a. Keini veng kilkhawra awmte pawhin hnaite teah vawksa leh arsa a Kg-a lei tur kan hmu ve phak ta. Hmun hrang hrangah ran chaw leh damdawi lei tur a awm ta te, kan ran vulhten hliam leh damlohna an neih changa a cherchhiat hma a talh \hinten enkawl dam hram kan tum ta te hian Mizo mipuite nunzia a va thlak nasa em!!!

Hetih lai hian ka nun leh rilru luah khattu Industries Department-ah chuan a bengvar pawlin Khuai Babu an awm tih leh Puantah Endiktu an awm tih hi an hre ve tawh a. Ka pa hi thirchher \hin, silver-a Belleh Khuhhriang te pawh chhung \hin a ni a. Hawlh tawn pum a hman \hin te chu a thlalak en ngawt loh chuan sawifiah thiam chi pawh a ni lo. |hutthleng hniam te hi a tukin kan tuk \hin a. Zingah khawvar ar khuang leh buh deng thawm a insai kalh nuk nuk a,

Thingzaina chu a lianin a sei hle a. Thing sang leh rinawm tak a dawh a ngai a. Ka nu belvuak dai pawnah kan rawh a, a tukah kan zuk lak hmain bawngin an lo rap keh rum mai a. Khata ka nu mittui tla kha chu ka dam chhungin ka mitthlaah a cham dawn a nih hi.

Mizoram Union Territory kan nih a\angin Assam a\angin Dan \henkhat Loan leh Grant (Subsidy) dan te hmangin Industries Department-in hma an la \an ve a. Rampum Extension Officer pakhatin a awp \hin kha Assitant Director (Cottage Industries)-ah dah chhoh a ni a. Rei vak lo chhungin Director te pawh dah an ni zui ta a. Suk leh sum, chempui, hachhek leh tuboh a\angin hma a han la ta a. Kei pawh hian buh deng paha kea khawm zel dan kha ka theihngihl hial tawh ang. Buhden kha a bik takin hmechhia, chhung tinte problem a lo ni nasa khawp mai. 1980 hnu tawhah khan Pukzingah an khaw post commander sualzia sawi chung a politician \henkhatin kal lo mai tura min ngen chhungin ka kal lui a; a chipchiar chuan sawi lo ila. Zannah public meeting kan nei a. In 100 khua vel a\angin ka thlen in khat tlatin an lo pungkhawm a. Chu khua a\ang chuan pakhat chauhin buhdengkawl Hire Prurchase Loan-in a dil a. Buhdengkawl nei an la awm hauh loh avangin in tinin suk leh sumin buh an la deng a ni. Ka thusawi tawp lamah, “Tun a\anga rei vak lovah in khuaah hian buhdengkawl a awm ang a, in buhden a ban ka beisei,” tih kan sawi chu kut an beng ringin a rei khawp mai.

Kawng hrang hranga hmasawn zelin tunah chuan kan nula tlangval te pawhin suk leh sum awm dan pawh an hre tawh lo va. Thingzaina chauh ni lovin thir lam chi te pawh chi hrang hrang a siamna te a awm ta. Vai rizai siam an bo va, vai chhang zuar an bo va, vai pheikhawk siam, vai lumet, a sawi tur a tam mai. Kan Atta tur, Maida, Wheat Vai, Suzi te pawh tualchhungah ngei siam a ni ta. Vai chauhin an siam tur emaw kan tih thil ei chi, chi hrang hrang; cake, biscuit, chips, oxygen, food item pack mawi tak tak te mizo siam tih hre lovin kan ei liam buan buan ta mai. State pawn lamah pawh eng emaw zat chu a chhuak ve tawh a ni. Plastic thil siamte hi mizo siam leh vai siam kan hre hrang em? A danglamna chu mizo siam chu a tlo zawkin a man a tlawm zawk hi a ni ber. Kan rua leh mau, hmunphiah te hi a va \angkai ta em. Thir leh cement-a siam te pawh tualchhungah kan ti ve ta.

Vawikhat chu Mizoram Puan\hui Association-in Executive Committee an nei a. Chu Committee chuan puan\hui man a ti sang ta viau mai a. Mipui pawh an phun viau mai a. Chutih laia kan General Manager Pu Thanhnuna (R.I.P) hnenah, “Puan\huina hmun hi sorkar hian din ve ila, puan\hui man hniam deuhin ti ila vantlang tan a \ha ang, Vety pawh an bawngnute man a hniam avangin mimalin an bawngnute man an ti sang thei lo va. Mipui tan a \ha hle a ni,” ka ti a. Pu Thanhnuna min chhanna chu, ‘Entrepreneur te kan compete chu a \ha lo vang. Industries Department chu mite thilsiam tura chawk phura, kaihhruai ngaite kaihruaia \anpui an \ul ang zela thurawn leh sum leh pai hmanga \anpuitu tur kan ni zawk. Thilsiam ve tur ni lovin, private party-ten an siamna tura lo \anpui hi kan tih tur a ni a. An hlawhtlinna chu kan hlawh tlinna a ni, “ a ti a. Hei hi Industries Department kal chhoh dan a ni ta a. Kan dil hauh loh Vairengte Fruit Plant sorkarin a mihring chawpa min barhluih chu a awm chhun a ni.

Hemi a\anga rei vak lovah State sokarin Industrial Policy siamin thilsiamtute a \anpuina tur subsidy scheme 9 (pakua) kan han nei ta \hawt mai a. Central lam pawhin industry dintu te \anpuina tur scheme chi hrang hrang a rawn siam ve bawk a. Heng scheme hrang hrangte

mipuiin a zar an zo thiam theihnan leh industry din duhte tana kaihhruaina turin \ul tlata ka hriat avangin kei hial pawhin lekhabu pakhat , 'INDUSTRY KAILAWN', tih ka buatsaih ve hial a. Hmun hrang hrang a\angin an \angkaipui thu te pawh ka dawng ve a ni. Hei bakah hian mipui te zirtir leh chawk tho turin Industries Department-in Industrial Motivation Campaign, Mizoram dung leh vangah nasa takin a kalpui bawk a.

Hetiang kaihhruaina leh sum leh paia \anpuina hian industry a tipung nasa ta hle mai a. Subsidy duh avang ngawta industry din tumte pawh kan indang seng ta mang lo va. A tlangpuiah chuan mi tam takin industrial unit leh production chi hrang hrang lo pung chho zel aiin subsidy an hmilian a. Thilsiam chhuah chi hrang hrang lo piang ta leh lo piang zel tura private hnung a rinawm taka lo ding Industries Department hi an hmu tel thiam vak lo bawk a. Industrial development scheme leh project kan hotu hmasaten han siam mahse a enkawltu tak tak chu kum thum tling mang lo chamte an ni zel a. Industries Department-in industry te tak tē tē kan lo din te pawh hma zau zawk la thei tura kan din Board leh Corporation ten an han belhchhah a. A dintu department min hliah bo zel a. Chuti chungah hetiang taka mizote khawsak dan leh an rilru putzia thlak thlengtū Industries Department mi leh sa ka lo ni ve hi ka lung hi a awi hliah hliah \hin. Ka service chungah ka nupui fanaute enkawl nan leh in leh lo din nan loan chi hrang hrang 12 hmuh theih leh rulh zawh te kha. KA'N HAWIKIR A Industries Department lo thil dang ka hmu miah lo.

Industry Meichher

Apr-Jun, 2018